

## Internacia fotokonkurso de „La Ondo de Esperanto“

Post naŭ sukcesaj konkursoj (1998-2006) la redakcio de „La Ondo de Esperanto“ invitas al partopreno en la deka Internacia Fotokonkurso. En la fotokonkurso rajtas partopreni ĉiu fotemulo amatora aŭ profesia, sendepende de la loĝlando kaj lingvokono. Unu persono rajtas partopreni per maksimume kvin fotoj. La minimuma formato estas 15×20 cm. Fotoj povas esti koloraj aŭ nigra-blankaj, vertikalaj, horizontalaj kaj aliformataj. Fotoj senditaj elektromekanike ne estas akceptataj.

La konkursaj fotoj devas esti senditaj al la sekretario de la konkurso, Halina Gorecka (RU-236039 Kaliningrad, ab. ja. 1205, Ruslando). La fotoj devos atingi la sekretarion antaŭ la 1a de decembro de 2007.

La konkursaĵoj devas esti subskribitaj per pseŭdonimo. En aparta koverto kunsendata devas esti slipo kun la pseŭdonimo, vera nomo, poŝta adreso kaj retadreso de la aŭtoro. Oni povas aldoni titolon aŭ klarigan noton al la fotoj. En la konkurso ne rajtas partopreni fotoj jam premiitaj aŭ publikigitaj.

Juĝkomisiono aljuĝos premiojn al la laŭreatoj. Estas speciala premio por la plej bona foto pri la temo Festoj.

Ĉiu premiito ricevos diplomon. La rezulto estos anoncita en „La Ondo de Esperanto“. La organizanto de la konkurso havos ĝis la 31a de decembro en 2009 ekskluzivan rajton uzi la ricevitajn fotojn en papera kaj elektronika formo kaj en ekspozicioj. Poste la publikigo-rajton havos kaj la organizanto kaj la aŭtoroj.

*Halina Gorecka  
sekretario, sezonoj@kanet.ru*

## Internacia konkurso pri kurtfilmoj

Triesta Esperanto-Asocio lanĉas la duan internacian konkurson pri kurtfilmoj, je libervola temo, ital- kaj/aŭ esperant-lingvaj, aŭ alilingvaj sed kun surskribaĵoj en la itala aŭ esperanta lingvoj. La kurtfilmoj povas esti ankaŭ senparolaj.

La verko, sendota al la konkurso, ne

estu jam prezentita en aliaj similaj aranĝoj, tial la aŭtoro subskribu oficialan deklaron tiusence.

La kurtfilmo devas esti en formo de DVD aŭ VHS kaj ne superu 15-minutan daŭron. Ĝi ne estos redonita. La aŭtoro sendu poŝte sian verkon ĝis la 15a de decembro 2007 al tiu ĉi adreso: Esperanto Trieste, C.P. 601 Trieste Centro, IT-34101 TRIESTE – ITALIA

*Franz Josef Braun*

## Paŭlo Moĵajev nova redaktoro de „Kontakto“

Per komuna decido de la estraroj de TEJO kaj UEA Pavel (Paŭlo) N. Moĵajev el Ukrainio transprenos de Ĵenja Amis la redaktorecon de „Kontakto“. Ĵenja Amis estas redaktoro de la socikultura revuo de TEJO ekde 2002. Post pli ol kvinjara sukcesa kaj multe laŭdata laborado ŝi laŭgrade transdonos la respondecon al sia posteulo ĉi-jare.

Paŭlo Moĵajev naskiĝis en 1981 kaj diplomiĝis en 2003 en la Krimea Ŝtata Medicina Universitato en Simferopolo, kie li nun estas instruisto pri anatomio. Kun Esperanto li konatiĝis en 2000 kaj ekde tiam aktive partoprenas la landan movadon. Ekde la jaro 2003 li okupiĝas pri provlegado de „Kontakto“, kies redaktoron li pasintjare ekhelpis kiel vicredaktoro. Partoprenantoj de pluraj Esperanto-aranĝoj povis ekkoni ankaŭ liajn muzikajn talentojn; ekz. en IJK-oj en 2004 kaj 2005 li koncertis prezentante proprajn kantojn. Moĵajev estas ankaŭ aktiva Esperanto-instruisto kaj diplomiĝis pri la Cseh-metodo. Li verkas, tradukas kaj lastatempe laboras ankaŭ je Esperanta-rusa vortaro.

*el gazetara komuniko de UEA 261*

*fonto: Ret-info*

## Comenius Esperanto in Litauen

Im Rahmen eines von der EU geförderten Comeniusprojekts waren wir vom 21. Mai bis zum 1. Juni 2007 Gastlehrer am Merkeliu Raĉkausko Gimnazija in Mažeikiai, Litauen. Sehr erleichtert wurde uns die Kommunikation durch drei Lehrerinnen an dieser Schule, die Esperanto sprechen. Folgende Fremdsprachen werden hier un-

terrichtet: Englisch, Russisch, Deutsch und Esperanto. Derzeit lernen bei Gražina Opulskiene 13- bis 18-jährige Schülerinnen und Schüler in drei Gruppen Esperanto. Gražina Opulskiene ist außerdem Bibliothekarin und unterrichtet das Fach „Sicherheit im Alltag“.

Frau Opulskiene informierte uns in Esperanto eingehend über das Unterrichtswesen und das Bildungssystem in Litauen. Sie vermittelte uns auch Gespräche mit dem Bürgermeister und dem Vizebürgermeister der Stadt Mažeikiai, wobei sie ebenfalls als Dolmetscherin fungierte.

*Walter und Renate Klag*

## Festo en Antverpeno

La Antverpena klubo „La Verda Stelo“ festis sian centjarigon dum Pentekosto 2007. Do estis malfacila decido, ĉu partopreni tie aŭ la Germanan Esperanto-Kongreson en Hamburgo. Pro internacieco kaj malnovaj amikecaj ligoj ni finfine elektis Flandrion. Kaj ni malbedaŭris la decidon!

Ĉe la urbodoma akcepto ni inter 15 nacioj reprezentis Germanion, sed tio estis nur unu ero el la abunda programo. Okazis kursaro pri Vikipedio, diversaj prelegoj kaj ekskursoj al multaj vidindaĵoj en Antverpeno.

Kulmino estis la festbankedo sabaton vespere. Se mi – kiel konata elektema plendemulo rilate al mangaĵoj – konfirmas, ke estis amaso da bongustegaĵoj, vi povas kredi min. Ĉio estis memfarita de la Verdstelanoj, ne nur por la bankedo, sed la tutan semajnfino.

La bankedon kronis koncerto de Jomo, kiu tiel rave ludis kaj kantis, ke ĉe la fino la junularo dancis sur la tabloj.

La ĉirkaŭ 150 partoprenantoj travivis ne ian jubilean aranĝon, sed veran feston. Eĉ la deĵorantaro ĉe kaso, bufedo, kuirejo kaj aliloke, kiu vere multege laboris, trovis momentojn por ĝui la etoson, tiel ke ĉie videblis nur gajaj vizaĝoj.

Gratulon al la Antverpenanoj pro la sukcesa semajnfino, dum kiu ĉiu trovis ion laŭ sia gusto, de la etaj infanoj ĝis la 92-jara honora prezidanto. Ili vere scias festi!

*Pit Hauge*